



UPA 2017/126-01

28-04-2017

Meeqqanut atuartunut perorsaanikkut inerikkiartuutaasunik sunngiffimmi neqeroorutit pillugit inatsisartut inatsisaat nr. xx, xx. xxx 2017-imeersoq.

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Meeqqanut atuartunut perorsaanikkut inerikkiartuutaasunik sunngiffimmi neqeroorutit pillugit inatsisartut inatsisaattut siunnersuut Partii Naleraq sinnerlugu imannak oqaaseqarfigissuarput.

Meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumik perorsarsimassusaannut iluaqutaasussamik nunatsinni meeqqat suli atualinngitsut aammalu atuartut perorsaanikkut inerikkiartuutaasumik nuna tamakkerlugu atuinissamut periarfissaqalernissaat qanoq iliornikkut qulakkeerneqarsinnaanerat pillugu apeqquteqaat aallaavigalugu inatsisartunut ilaasortap, maannalu Naalakkersuisunut ilaasortaasup Hans Enoksenip siorna oqallisissiaanut manna siunnersuut arlalitsigut tunngavimmigut naapertuuttoq Partii Naleraq sinnerlugu imannak oqaaseqarfigissuarput.

Nunatsinni meerartatta pitsaasumik atugaqarlutik peroriartorlutillu angerlarsimaffimmini, meeqqerivinni, atuarfinni, allanilu ulluunerani ornittakkani, meeqqat paarineqarnerinut pitsaasumik atugaqartitsinissarput tamatta *inuiaqatigiinni naleqartitavut tunngavigalugit* ilaqtariinnut inuiannullu tamanut meerartaqarnerup nuannersuunissaa suli pitsaanerusunik aqquutissiuuttariaqaratsigit.

Aamma isumaginninnermi perorsaat, meeqqerivinni ningiut, isumaginninnermi siunnersortit allallu inulerinerup iluani inunnik ilaqtariinnillu sullissisut allaffissornerujussuarmik suliaqartinneqarnerat allanngortinneqartariaqartoq isumaqarpugut.

Tassami tamatta nalunngereerparput, ilaqtariippassuit ulluinnarni inuuniarnikkut angummanniapiloortut qanoq amerlatigisut. Ilami pisortatigoortumik paasissutissat naapertorlugit

kalaallit nunatsinni inuit 70 procenti sinnerlugit aningaasarsiakinnerpaatut akunnattumillu annertussusilinnik isertitaqartartuupput.

Aamma naluneqanngilaq inuppassuit ilaqutariippassuillu inigisaminniit anisitaasartut amerlingaluttuinnartut.

Taamaattumik pingaartumik ilaqutariinnut arlalinnik meerartalinnut atugassarititaasut oqilisarneqartariaqarput, meeqqerivinniititsinernut meeraaqqerivinniititsinernullu aamma akit naleqqussarneqartariaqartoq isumaqarpugut. Tassami apeqqutaasariaqanngilaq kommunimi sorlermi najungaarnej, soorlumi meeqqanut tapit kommunimi sumiinneq apeqqutaatinnagu assigiimmik atuutsinneqartoq.

Eqqaamaneqartariaqarpormi ilaqutariit akissarsiakinnerit ilungersunartorsioraluaqisut, kisianni suli annerusumik ilungersunartorsiortut aamma tassaammata anaanat ataatalu kisimiittut, ilaqutariillu akunnattumik annertussusilinnik isertitaqartartut, taakkuuppummi amerlanertigut, ineqarnermut, meeqqerivinnut meeraaqqerivinnullu tapiiffigineqarsinnaanngitsut.

Tassami ilaqutariippassuit meerartallit inuuniarnikkut atukkamikkut ilungersunartorujussuarmik inissisimapput.

Tassami ineqarnermut akit qaffasissorujussuupput, taamaammat-una aamma Partii Naleqqamiit siorna upernaakkut ataatsimiinnitsinni ilaqutariit pissakinnerusut akunnattumillu akissarsiallit namminerisaminnik illutaasinnaanerat initaasinnaanerallu anguniarlugu aaliangiiffigisassatut siunnersuuteqartugut, qujanartumik partiinit amerlanerussuteqarluartunik taparserneqartumik.

Isumaqarpugut kommuunit Namminersorlutillu oqartussat qanimut suleqatigiillutik ilaqutariinnut meerartalinnut meeqqerivinniititsinernut meeraaqqerivinniititsinernullu akit apparsarneqarnissaat aqquutissiutariaqaraat.

Tassami meeqqeriveqarnernut meeraaqqeriveqarnernullu tunngasut kommuninit akisussaaffigalugillu isumagineqartartut, kisianni taamaakkaluartoq takusinnaavarput ajornartorsiutit qulaani oqaatigisavut aamma ataasiaannarata maani eqqartortakkavut, kommunit kisimiillutik aqqiivigisinnaanngikkaat.

Tassami Nuummi pissutsit periarfissallu sinerissap sinneranut naleqqersuunneqarsinnaanngilluinnartut nalunngilarput, pingaartumik nunaqarfinni aamma meeqqeriveqarnikkut periarfissaqanngitsut eqqarsaatigalugit.

Taama oqaaseqarluta siunnersuut taperserparput suliallu aappassanneerneqannginnerani
Isumaginninnermut peqqissutsimullu ataatsimiititaliami suliarineqarnissaa inassutigalugu.